

餅水齋詩集
一



餅水齋詩集
二



餅水齋詩集
三



餅水齋詩集
四



餅水齋詩集
五



餅
水
齋
詩
集

舒
位
著

中
華
書
局

餅水齋詩集



餅水齋
位著

中華書局

餅水齋詩集

三

舒位著

中華書局

餅水齋詩集

四

舒位著

中華書局

餅水齋詩集

五

舒位著

中華書局

叢書集成初編

餅水齋詩集 五冊

中華書局出版發行

(北京王府井大街三十六號)

秦皇島市資料印刷廠印刷

一九八五年北京新版

開本：七八七乘一〇九毫米三十二分之

統一書號：一七〇一八·一五

耕水齋詩集

此據畿輔叢書本
排印初編各叢書
僅有此本

餅水齋詩集卷一

大興舒位著

元默攝提格

銅柱

日微煩郵吏。雲臺失畫工。關中遲鄧禹。牀下拜梁松。豈有三遺矢。曾經一挂弓。可憐銅馬式。何處烏呼龍。突兀三千仞。摩挲五百年。將軍功略地。丞相樹參天。華表疑歸鶴。淫谿感視鳬。六州誰錯錯。只有謗書傳。崑崙關作

不到崑崙山。直上崑崙關。三更銅面具。一曲大刀鐮。絕壁飛諸將。華燄耀百蠻。我時倘投筆。定可勒銘還。叩頭蟲

叩頭蟲。無腰而折。無手而空。跂跂脈脈。何所求。剝剝啄啄。頻叩頭。獨不見斷頭將軍。強項令。與蟲語。冰蟲弗聽。

斷腸花

斷腸花。碧於血。雙心一。株相歡悅。一夫兩心相決絕。妾是海棠根。郎是菖蒲節。斷腸花可食。斷腸之人不

可得。

相思子

埋得相思住。種出相思樹。千秋萬歲相思處。烟雲過眼月入懷。琵琶一聲花亂開。爲君紅結相思胎。

催歸鳥

催歸催歸日未西。鴛鴦不獨宿。鷓鴣亦羣飛。遶西春夢黃鸝啼。碧紗如烟鳥欲棲。催歸鳥。歸家好。歸已遲。別太早。

柳州柳子厚祠

密雨驚風外。何人識柳州。竄身來絕域。失足誤清流。鳥下山城夕。花香水殿秋。潮陽祠屋近。無那故人愁。

東泉旅夜

逆旅東泉道。深宵景象殊。澗猿流月響。野虎負風趨。仰屋桄榔暗。循牆薜荔籠。青鐙搖一豆。詩興強支吾。

鮓虎行

鬼門關前人似海。猛虎捉人如捉鬼。人鮓甕中虎雜居。居民鮓虎如鮓魚。爲言前宵侵鬼來。悲風蕭蕭林木摧。山根舊有伏機弩。弩末不能穿虎股。不如左手提鐵叉。右手打銅鼓。虎聞鼓聲見叉影。竿尾箕睛怒而舞。是時虎意已無人。人亦不復目有虎。劃然一嘯當一叉。一叉虎口開血花。抽叉猝虎四山響。月破風腥一虎仰。雙杖椎鼓雨點塵。沈沈九地追虎魂。天明曳虎歸茆屋。不寢其皮食其肉。生吞活剝呼巨觥。白

酒黃粱一齊熟。我聞色變眉欲飛。是食人多母乃肥。彼云食虎可避瘴。未下鹽豉敢相餉。搖頭謹謝阿羅漢。願君努力加餐飯。欣然就食甘如飴。風毛雨血忘朝饑。吁嗟乎。周處南山除一害。李廣北平官不拜。我如雞肋感曹公。爾自彘肩壯樊噲。歌成曠野良足豪。嚼過屠門亦稱快。慎勿消息傳入城。縣官來收虎皮稅。官來收稅尙猶可。吏食爾虎如食菜。爾有虎皮何處賣。

綠珠井

古井波瀾少。曾憐照影時。身亡顏色累。腸轉轆轤知。故里山雙角。高樓笛一枝。景陽宮在否。差泥石欄脂。

桂林鷓鴣詞

相思嶺上石屏顏。啼鳥聲聲在樹間。苦勸行人行不得。行人已上萬重山。秋老西風入桂林。雨絲細細霧沈沈。蒼梧山近黃陵廟。啼殺湘花一片陰。斜陽紅樹曾相見。暮雨青林何處棲。只有鷺鷥不作客。一雙飛去浪如梯。

遊七星山棲霞洞

四山轉如圍。一洞鑿其空。跳出山外山。采入洞中洞。日月所不到。操炬以動衆。照見諸變相。鬼神恣搏弄。黑伏石萬尖。青瀉天半縫。蛇行曲竇細。狐聽冷泉淪。迤邐三里餘。人語聚一壺。徑絕通風雲。出險如出夢。但覺精魂搖。不惜腰腳痛。身輕霞可餐。胸雜星可種。來聞清猿嘯。歸與寒鴉共。老樹挂斜陽。前谿一僧送。

陡河

有山無水處。陡河作其間。三十有六陡。七十有二灣。灣灣各陡陡。不離馬頭山。山似攔水出。水竟尋山還。縈回青絳帶。宛轉碧玉環。築席聚涓滴。排石喧孱顏。扁舟逐波去。櫓唱聲聞關。相傳鑿山骨。轉粟征南蠻。至今太平時。尙濟行李艱。乃知古有事。其利久未刪。不然桂海涸。踏破層烟鬟。

永州

一水如衣帶。風吹入永州。朝陽巖上日。遙見瀟湘樓。菴埕草書好。谿山小記幽。榜人問前路。未解意勾留。

浯谿觀元次山三吾詩刻石

占得谿堂勝。蕭然獨往時。可憐循吏傳。猶是盛唐詩。飲酒都成例。磨厓亦有碑。先生能造字。比似買山奇。

衡山道中

歲晚蕭條倚短篷。相思迢遞冷芙蓉。山從九面帆邊轉。水到三閭廟下濃。宰相徵時徵故事。夫人仙去祕靈蹤。玉璫絨札看征鴈。方便飛回第幾峯。

昭陽單闕

岳陽樓

人間何處無城樓。惟有此樓傳岳州。二月八月湖裏水。南風北風天際舟。千年楚客誰憂樂。兩首唐詩自倡酬。卻上君山夢吹笛。數聲飛作洞庭秋。

江行雜詩

大地有時圻。長天無盡流。春風吹不斷。渺此一扁舟。日月摩雙鏡。乾坤禁百洲。阿誰能賦者。殘夢贈青樓。一夜天花墜。蕭條散雪歌。長橋眠鐵鹿。澀浪踏銀鼉。龍水翻千偈。漁燈畫一蓑。輸他驢子背。詩思響嵯峨。春色望長沙。江聲何處家。相邀玉鸚鵡。一唱銅琵琶。遠聚山如米。平開浪作花。英雄兒女淚。懷古蕩無涯。好景三春好。長江萬里長。連雲暗巴蜀。計日下荊襄。風急豚魚拜。天空野馬翔。身非衛叔寶。對此亦茫茫。

初發樊城

車輪轉處似羊腸。初試馱鈴道里長。新婦可憐三日閉。陳人同此百年忙。雞鳴腸膊開茆店。龍臥蕭條臘土岡。略記短長亭畔路。襄陽北去是南陽。漸看青草四邊生。稍喜紅泥一軌平。人面沾塵如敗鼓。客心薄暮抵懸旌。繩牀投宿燈搖夢。蕙肆加餐餅噉名。二十四番彈指過。鳳城楊柳萬條橫。

邯鄲道上作

細雨濛濛薄埃。邯鄲道上杏花開。春愁宛轉隨車轍。古意蒼茫付酒杯。未熟黃粱唐小說。已埋青草趙叢臺。不嫌茆店知音少。曲項琵琶夜抱來。

題柳

一絲楊柳一梭鶯。費許天工織得成。已是春愁無片段。峭風猶作剪刀聲。